



السلام عليكم ورحمة الله أهلا ومرحبا بكم يا
شباب منورين كيف الحال؟ الله يبارك فيكم
يا رب ويرضى عنكم... الدنيا تمام؟ الصوت
واضح؟ تمام جزاكم الله خيرا منورين لايف
الاثنين الجامعة وسنينها كل شباب الجامعة
يجمع هنا رجعتوا الجامعة؟ الله يقويكم آه
الجامعة ذكريات ذكريات ذكريات سعيدة
مش وحشة الواحد الحمد لله كانت الجامعة
سبب في التزامه سبب التزامه الجامعة والتزم
بسبب الجامعة هو دي كفاية يعني لو كل

حاجة وحشة في الجامعة بس كانت الجامعة
سبب ان واحد يتوب إلى الله سبحانه وتعالى.
مش مهم أي حاجة مش مهم أي حاجة....
كل حاجة كانت سهلة بس هو عموما الجامعة
بالنسبة لي كانت أيام حلوة يعني آا انا كنت
في هندسة هندسة اسكندرية قسم كهرباء
اتصالات وما ادراك ما قسم كهرباء اتصالات
هندسة اسكندرية كانت أيام حلوة يعني بس
للعلم يعني من باب التشجيع يعني أنا كنت
بجيب جيد جدا يعني تقديري جيد جدا. ما مش
فاكر إن أنا يعني جبت في مادة مقبول قبل كده
اعتقد جبت في مادة أو مادتين في الخمس
سنين كان عندي مقبول دي آه حاجة مؤلمة
شوية فما كنتش أشوفها كثير يعني أقل حاجة
جيد. جيد جدا امتياز وارد والحمد لله

اتخرجت بتقدير جيد جدا. ودي معجزة على
فكرة يعني. ما تستقلش بجيد جدا في اتصالات
اسكندرية دي جت بطلوع الروح يعني. بعد
توفيق ربنا سبحانه وتعالى طبعاً آآ لأ احنا
اتطحننا يعني والحمد لله كان كان آآ يعني
بفضل الله سبحانه وتعالى الواحد كان الفترة
دي كان بفضل الله من أجمل فترات حياته في
الهداية والالتزام مع المذاكرة وهقول لكم فيه
انا كنت حريص على المذاكرة في الكلام بقى
اللي هنقوله النهارده لكل الناس اللي هتابعنا
في اللايف النهاردة لكن ده مقدمة تشجيعية كده
يعني شدوا حيلكم يعني شوية. وللعلم الانسان
بيوقفش يعني ما بيوقفش تعليم أبدا يعني. ما
الحمد لله الحمد لله بفضل الله سبحانه وتعالى أنا
عملت بعد الكلية اتنين ماجستير اتنين

ماجستير. بس مش في هندسة مع اني شغال
مهندس طبعا اتصالات وشغال مدير في في
شركة شركة كبيرة يعني. بس عملت ماجستير
في ادارة الاعمال MBA وماجستير ثاني في
السنة النبوية الحمد لله الماجستيرين جبت فيهم
تقدير امتياز.. معكم واحد يعني ايه شاف كل
حاجة يعني. شاف كل حاجة. أنا خريج ألفين
وسنة. اتخرجت سنة ألفين وسنة يلا خدوا
شوية معلومات شخصية قديم أوي يعني آخر
مرة شفت الجامعة دي من زمان بس شفتها
ثاني في الماجستير ماجستير ده كان من ثلاث
سنين ولا حاجة. فرحت بقى المجمع النظري
بتاع اسكندرية قعدت فيه سنتين بس كانت
أيان برضو لطيفة يعني شفت الواقع الأليم
اللي حصل في العالم بعد ما اتخرجت انتم

عارفين يعني أنا مش بقول الكلام ده يعني
منظرة ولا بتاع مش قصدي آسف يعني بس
لازم أنتم تفهموا أن التدين يستلزم منك النجاح
في الحياة. ومحاولة بذل أقصى مجهود تقدر
عليه، إنك تحاول تكون مجتهد في حياتك.
ناجح في حياتك ليه؟ علشان اللي هنقوله
النهاردة النهاردة هنقول كلام مهم. ياريت
بسرعة جدا الآن تعملوا بقى شير فظيع للايف
زائد منشئات بقى لا حصر لها لكل حبايينا
اللي في الجامعة

**بسم الله الحمد لله وأشهد أن لا إله إلا الله
وحده لا شريك له وأشهد أن محمدا عبده
ورسوله صلى الله وسلم أما بعد..**

أهلا ومرحبا بكم في لقاء جديد لقاء من
الجامعة وسنيناها الجامعة وسنيناها ايه بقى

الجامعة وسنينها دي؟ الجامعة وسنينها فترة
الجامعة فترة مميزة جدا. تكون أي حد في
حياته، يعني أنا دلوقتي لو قلت لكم إني خريج
٢٠٠٦ يعني متخرج من حوالي ١١ كثير قوي
متخرج من زمان مش يعني من انتاشر سنة
من ستاشر سنة اتخرجت بس ما زالت فترة
الجامعة فترة عجيبة فترة عالقة في الذهن..
تحس أن هي فترة فارقة في حياتك حاجات
كثير اتغيرت في حياتك بسبب الجامعة...
شفت في الجامعة أحوال وناس ومريت بأحوال
مختلفة يمكن أنا في سنة أولى جامعة ما
كنتش ملتزم تقريبا تانية لأ الوضع اختلف
تماما. الحمد لله التزمت شفت كل حاجة يعني
عارف أسوء أوجه الجامعة وأجمل أوجه
الجامعة واكتشفت أن الجامعة دي ممكن

تكون أسوء أيام حياتك وممكن هي هي تكون
أجمل أيام حياتك زيه ازي أي حاجة على
فكرة زي الجيش؛ الجيش ممكن يكون اسوأ
أيام حياتك وممكن يكون أجمل أيام حياتك.
الجواز كل حاجة كده بس أنت ازاى تصنع
الجمال، وازاى تقدر تطلع من الجامعة دي
بأكبر مكاسب ممكنة فخلونا النهاردة نحاول
ندردش كده فى شوية حاجات تخلى لك
الجامعة دي أجمل أيام حياتك. وتبقى فعلا كل
ما تفكرها تقول ياااه فىن أيام الجامعة؟ فىن
ايام الجامعة وجمالها؟ على قد ما فيها من
تعب، على قد ما فيها من مذاكرة على قد ما
فيها من بهدلة أحيانا لكن هتظل طول عمرك
تقول ياه فىن أيام الجامعة الجميلة؟ الله يرحم

أيام الجامعة كانت رائعة ما عملتش في حياتي
اللي عملته في أيام الجامعة

■ إيه هو بقى اللي مفروض أعمله في
حياتي؟ تعال أقول أول حاجة علشان نبقي
واقفين على أرض كده واضحة فلانم تسأل
نفسك هو أنا اصلا بعمل إيه في الجامعة؟
يعني أنا جاي هنا ليه؟ نفس السؤال ده بتسأله
لنفسك في أي عمل بتعمله؟ لازم يكون في
سؤال متكرر بتسأله لنفسك في أي عمل
بتعمله... أنا بعمل العمل ده ليه؟

■ ليه بعمل كذا؟ ليه عايز اتجوز؟ ليه عايز
ادخل الجامعة؟ ليه أنا في الجامعة؟ ليه بتعلم؟
ليه بشتغل؟ الأسئلة في كل حاجة في حياتك
بتعملها... لازم السؤال ده يعدي. ليه؟ علشان
على أساس النية كل حاجة بعد كده بتترتب...

كل حواراتك بعد كده هي فرع عن النية اللي
أنت نويتها في البداية فإذا صلحت النية بارك
الله في العمل وإذا فسدت النية لم يبارك لك
في عمله هتقول لي ايه ده واجب فيها نية؟
أحنا رايعين الجامعة يعني كده يعني سنة
الحياة رايعين الجامعة عشان نقضي يومين
وربنا يعديها على خير رايعين الجامعة بس
عشان أيام سودة هنقضيها وخلصت

لا لا لا الكلام ده كله غلط انت لو فعلا فاهم
قد ايه المكاسب اللي ممكن تطلع بها من
الجامعة هتفرق معك كتير في حياتك أولا
خلينا نتعلم حاجة؛ إن كل حاجة في حياتك من
أعمال الدنيا بتعملها دايمًا بتحتمل ثلاث
احتمالات؛ احفظوا الاحتمالات دي؛ الاحتمال
الأول أن العمل ده في ميزان حسناتك.

الاحتمال الثاني أن العمل ده في ميزان سيئاتك. الاحتمال الثالث أن العمل ده لا أجر ولا وزر. لا أجر ولا وزر. ازاي؟ الأمر بيترتب على النية حديث جميل النبي عليه الصلاة والسلام قاله احفظوه وهقول لكم تعملوا ايه بعد ما تسمعوا الحديث ده النبي عليه الصلاة كان بيقول: الخيل ثلاثة أو الفرس ثلاثة، الخيول ثلاثة، قال لرجل أجر ولرجل وزر ولرجل ستر. يعني الفرس ممكن تاخذ عليه أجر، وممكن تاخذ عليه وزر وممكن يبقى ولا حاجة مجرد ستر فقالوا له ازاي؟

قال: الراجل الأول الفرس ده ربطه في سبيل الله جعل الفرس في سبيل الله، فله أجر في بوله وورثه وبتاع كل حاجة بيعملها بياخذ عليها أجر.

طيب قال: ورجل اشترى فرس رياء وسمعة،
يرائي كدة عشان الناس تقولوا بصوا معاه
وجامد والجمدان وبتاع، قال: فهي عليه وزر.

قال: ورجل اشترى فرس ليركبها، يعني هو
جايها بس يركبها يروح بها مشاوير. قال فهي
له ستر حلو؟

فده الحديث ده حديث عظيم جدا ليه؟

لأن شيل كلمة الفرس وخط أي حاجة بتعملها
في حياتك ونطبق نفس القاعدة دي ونطبق
نفس القاعدة ديت على ايه؟ على كل كل حاجة
في حياتك، شيل كلمة الفرس وخط ايه؟،
الجمع ثلاث: الأجر ولرجل وزر ولرجل ستر

الجواز او الزواج ثلاث أجر أو وزر أو ستر،
الشغل والعمل ثلاث، ممكن يبقى عبادة اللي

هو اجر يعني. ممكن يبقى اسم وزر. ممكن
يبقى ستر العمل انت عبادة لو النية صلحت
فيه زي ما هنقول في الجامعة كده، الجواز
يبقى عبادة. لو فيه نية صالحة تعف نفسك
تعف امرأة مسلمة تبني بيت مسلم انك انت
تربي أسرة طيبة صالحة وهكذا، في واحد
بيتجوز عشان السمعة

عيلة كبيرة وحاجة فخ وفلوس حلوة وبتاع
ووجاهة، وفيه واحد بيتجوز كده يعني بيتجوز
ليه؟ ما من سنة الحياة مش عارف هو انا قالوا
لي اتجوز يعني

بس انا ايه بس يعني انا مش فارقة معي بس
هو انا اتجوزت عشان اريحهم وخلاص، فده
ستر بالنسبة له الجواز ستر. الجامعة خرينا
نرجع للجامعة الجامعة هي لرجل أجر ولرجل

وزر ولرجل صبر، رجل أجر آآ اللي نوى بها
نية صالحة. زي ايه؟ واحد هنقول خليه دي
للآخر، طيب الوزر الوزر ييجي ازاي؟
الوزر يجي واحد داخل الجامعة ليه؟ يقول لك
واحد داخل الجامعة عشان ازبط بنات، يعني
ايه تزبط بنات حضرتك يعني؟ داخل الجامعة
نعيش بقى حياتنا فكك بقى من لبس الثانوي
والخنقة بتاعة لبس المدارس البس بقى ودلع
نفسك وخش بقى ايه هتلاقي بقى جيش بنات
قدامك عيش حياتك نقي زي ما أنت عايز
الجواري بتوعك هات وخذ راحتك والدنيا
اختلاط، واخيرا بقى دخانا الجامعة عشان
نتعرف ونزبط شوية بنات

■ والبنت داخلة الجامعة ليه؟ داخلة الجامعة

بقى عشان افك من خنقة الثانوية عايزة البس
بقى اللي البسه عايزة البس هدمي عايزة
البس بنطلوناتي عايزة البس المقطع عايزة
ابن بقى عايزة أحط ميك اب على راحتي من
ما حاجة تقرفني في المدرسة، عايزة اتعرف
على ولاد عايزة اقضي بقى ايام عايزة اروح
السينمات بقى واخرج واتفسح عايزة بقى بابا
يحل عن دماغي ما يقوليش المدرسة ومش
المدرسة

انا اقول له انا رايحة الجامعة وبعد كده بنزل
مع صاحباتي اروح بقى جامعة اروح سينما
اروح معهم اقعد في اي حنة عايزاها دماغي
فدول بقى ايه الجامعة بالنسبة لهم ايه الكلام؟
يعني تتصور إن ده نيته في الجامعة ده داخل

يعرف بنات، دي داخله عشان تتبرج، هي داخله شايفة الجامعة مكان أخذ فيه راحتني في اللبس، بابا مش هيعرف انا فين أي حاجة هقول له أنا في الجامعة، امشي بقى مع ولاد أروح سينمات الكلام وهو خاربها طبعاً الثاني دوت فدي وزر.

﴿ يعني دخول الجامعة بالنسبة للشخصية دي وزر لو كمل على كده.

والتالت الستر ده اللي هو داخل الجامعة ومش عارف داخل ليه. يعني هو يقول لك داخل الجامعة لازم نخش الجامعة، دخلت الجامعة ليه؟

عشان طلعت من الثانوية فأكيد لازم اخش حاجة مش هقعدي في الفاضي كده.

فده بالنسبة له الجامعة ستر يعني اللي هو في
اللالا ده مالوش دعوة بأي حاجة في الهوا،
تمام؟

■ طيب ازاي بقى الجامعة تكون اجر؟

■ هو ده المهم الجامعة تكون أجر، طيب خاينا

نقول ايه النوايا

لو كل واحد فيكم عنده نية يقولها لنا بس انا
كزا ريال النية من النوايا ومن أخطر النوايا أن
يرضى الله سبحانه وتعالى، وان يحبني الله
كيف يحبك الله في الجامعة؟

■ تقول لي الجامعة؟! الجامعة ربنا يحبني في

الجامعة؟ ده أنا حاسس إن أنا هخش النار
بسبب الجامعة دي، لا حديث الحديث ده حديث

حسن، قول النبي - عليه الصلاة والسلام -
(إن الله يحب إذا عمل أحدكم عملاً أن يتقنه)

إن الله يحب إذا عمل أحدكم عملاً أن يتقنه،
طب أنا داخل الجامعة ليه؟ داخل لكي أتقن
عمل يرضي الله سبحانه وتعالى هذا نوع من
العلم بتعلم علم وأنا سأكون شخص متقن في
العلم ده وأرجو من الله إن هو يحبني بسبب
اتقاني لهذا العمل دينيا ايه النية كمان؟ النية
التانية إرضاء الوالدين

أكيد يا جماعة أكيد أي حد من أهالينا أب أم
بيحبوا أن إحنا عمومًا نخش الجامعة، يعني
حتى بغض النظر ايه الجامعة اللي انت
دخلتها، خد بالك هو قبل ما أنت تخش هو كان
نفسه اه تخش هندسة، هو نفسه يخش طب،
والكلام ده الكلام ده في الايه؟ قبل.. لكن بعد

هو بيبقى فرحان إنك دخلت جامعة، يعني
يعني حتى لما دخلت أي كلية أهالينا بيبقوا
فرحانين إن إحنا رفعنا راسهم كده وبنكمل
تعليمنا، أصلا دخولك.. مجرد دخولك الكلية و
الجامعة أو معهد عالي مثلا ده بيسعد الوالدين،
يعني الدخول. تمام؟ ولسه بقى جوة في فرحة
تانية..

يعني هي مجرد إنك دخلت الجامعة أنت أهلك
فرحانين فأننا داخل عشان أمي تبقى فرحانة
داخل عشان أبويا يفرح بي كده نفسي أشرفه
نفسى أكبره. نفسي أقول له إنت مجهودك ما
راحش يابا إنت تعبت وتعبك ده على دماغي
من فوق دي حاجة بتفرح أبويا وأمي. دي
كفاية

بص النبي عليه الصلاة والسلام كان جاله
واحد من اليمن جاله واحد منين؟ من
اليمن.... فقال له أنت جاي ليه؟ قال جئت لكي
أجاهد معك. جئت لكي أجاهد قال ألك والدان؟

■ قال نعم. قال كيف تركتهما؟ هو النبي عليه
الصلاة والسلام كان عنده فراسة... توقع أنت
جاي من اليمن يعني. قال كيف تركتهما؟ قال
تركتهما بيكيان. تركتهما ايه؟ بيكيان. فالنبي
عليه الصلاة والسلام قال ارجع ارجع
فاضحكهما كما تركتهما بيكيان، بص للنبي
عليه الصلاة والسلام ما قلوش ارجع ارجع
ارجع بس ما كان ممكن يقول له ارجع عشان
ما يبكوش. قال لا. ارجع ايه؟

فاضحكهما. ارجع فاضحكهما كما تركتهما
بيكيان. إذا أنت تضحك والديك مش بس
تخليهم يبتسموا مش بس أن هم يبقوا فرحانين
لا أن هم يضحكوا ده مهم يعني ده عمل
المفروض كل يوم دماغك بتفكر هو هو أنا
ازاي هاضحك أبويا وأمي النهاردة؟ ازاي
أدخل السرور عليهم؟ افرفش أومي ازاي
اضحكها؟ موضوع مهم موضوع مهم... فأنا
لما داخل الجامعة كون أبويا فرحان بيا كون
أمي كده يوم ما أول يوم كده وأنا داخل
الجامعة أو مثلا سنة تانية ولا أنا في سنة تالثة
ولا خلاص هتخرج أومي فرحانة.... ده حلو
دي نية أنويها جوة بقى في اجتهاد في مزيد
من الرضا إنك أنت تتفوق يا فرحتي دخلت
الجامعة وقاعد تشيل في مواد وقاعد تسقط

وكل سنة أمك راسها في الارض وأبويها
مكسوف مني ومن درجاتي الزفت اللي بجيبها
كل سنة له يعني أنت فرحته في الأول. كمل
بقي. كمل بقي

يعني أنا أحاول جوة الجامعة نيتي ما احنا
قلنا اتقان

العمل. صح؟ ما اتقان العمل ما نشغلش
نفسينا هي مش نية في في الهوا دي نية
صادقة . يعني ببيان في العمل إنك صادق في
هذه النية. واخدين بالناس؟ فأنا دلوقتي لازم
أصدق في هذه النية أنا قلت العمل. يبقى
يترتب على ذلك إن أنا هبقى كويس هنجح
هجيب تقدير . وبالتالي كل سنة أبويها وأمي
هبيقوا فرحانين أكثر فخورين بي أكثر
سعداء أكثر. ادخلت عليهم السرور. فدي نية

نية كويسة النية الثالثة النية الثالثة وهي إنك
تطلب علم ما تنفع به المسلمين تطلب علم
تنفع به أهل الإسلام. تمام؟ طب هندسة تجارة
اداب تربية هتطلع معلمة تربية اجتماعية
مدرس طبيب مهندس في الآخر ستخدم
المسلمين وممكن مكانك ده وعملك ده يكون
فيه إصلاح إن أنت إن شاء الله تكلم واحد
كويس فبتنتوي إن أنت إن شاء الله توصل
حاجة كويسة وإن يكون أهل الصلاح في
الاماكن القوية أحسن ما يوصل أهل الفساد
طب أهل الصلاح يوصلوا إزاي لو ما كانوش
متفوقين وناجحين وعندهم عزيمة وأهل
الفساد قاعدين يسهروا ويطلعوا والكلام دوت
فأنا ناوي اجتهد عشان أوصل لمكانة كويسة
بدل ما واحد فاسد يكون في المكان دوت .

من الحاجات المهمة اللي أنت بتنويها إنك أنت
تخش الجامعة لكي تتفوق لكي تكون مظهر
جيد للملتزم. يعني لو أنتم ناس من الناس اللي
هي ملتزمة ولا أقصد بالملتزم بس هو ملتحي
ومنتقبة مش ضروري وإنما أقصد بذلك كل
من هو فعلا يعني يعني بيسير في طريق خد
بالك الناس مش بتسمي بس الملتحي واللي
لابسة نقاب ملتزم أي حد بيصلي عندهم
ملتزم معش لو أنت شخص عادي بس ساعة
الصلاة بتروح تصلي صحابك بيعتبروك شيخ
الشيخوخ. صح؟ لو انت يعني لبسك يعني مش
احسن حاجة. بس كونك ما

لو إنتِ يعني لبسك يعني مش أحسن حاجة،
بس كونك ما بتغتايبيش، ما بتشتميش، ما
بتسمعيش مهرجانات، ما بتسمعيش أغاني،

بتصلي، معاكي مصالية في بتاع بتخشي
تصلي، بالنسبة لهم إنتِ يعني شيخة الإسلام
والجامعة جدًا.

فاللي عايز أقوله إن مسألة الملتزم ده مش اللي
هو الجامد قوي يعني، حتى النص نص، اللي
هو فعلا حريص إنه هو يكون قريب من ربنا
شوية، ده الناس بيعتبروه هو ده الملتزم
اللي في الشلة ما هو كله ضايع!

فاللي عايز أقوله إن رسالة لكل دول اللي
بيصلوا، اللي هي بتقرأ قرآن، اللي بتحفظ
قرآن، اللي ما بيشتمش، اللي ما بيمشيش مع
بنات، في الآخر تفوقك إنتِ هدف أهم من
تفوق أي حد، ليه؟ لأنك أنتِ الناس بتبص لك
من بعيد وأنتِ مش واخد بالك، بيتابعوك، وكل
ما كان إلزامك أكثر كل ما المتابعة بتبقى

أدق، يعني لو كمان بنتكلم في واحدة بخمار
ولا منتقبة مثلاً ولا واحد ملتحي، صدقني
التركيز معاك بيبقى أعلى بكثير، أنت مش
واحد بالك!

🔑 التركيز معاك ده بيبقى لسببين:

🔑 السبب الأول: إن في ناس كتير ناس كتير
عايزة تشوف التجربة دي، هل الشخص
الملتزم ده اللي هو بيصلي، ما بيكلمش بنات،
ما بيشرش سجاير، ما بيشرش حشيش، ما
بيسمعش مهرجانات، البنات اللي لابسة واسع،
اللي لابسة نقاب، اللي لابسة خمار، البنات
المؤدبة المحترمة اللي في الجامعة دي، هتعمل
إيه؟ اللي بتحضر دروس كتير، وطول النهار
تقول لنا دورات على النت، وطول النهار بقی
ماسكة كتب وبتذاكر، وبتحفظ قرآن، حياتها

كلها دين، يا ترى الشخص ده أو البنّت دي
حتجيب كام آخر السنة؟ وكله مستني يشوف
التجربة دي هتنتهي على إيه؟ خد بالك! كله
مراقب بس أنت مش واخد بالك، وكله مستني
الشيخ علاء جاب كام؟ الأخت خديجة جابت
كام؟ الأخت سمية جابت كام؟ صدقني فيه ناس
بتدور في الكشف على إسمك! وفيه بنات
بتدور في الكشف على إسمك وأنت ما
تعرفيه مش! عايزين يعرفوا البنّت اللي بنقاب
دي، اللي بتصلي، اللي بتحفظ قرآن جابت
كام؟ ليه؟ حاجة من الإثنين: إما إن هو عايز
يخوض التجربة دي أو يمشي في المسار ده
بس هو خايف، وحاسس إن المسار ده
بيتعارض مع التفوق الدنيوي، وإن أنا مش
هعرف أجمع بين الدين والتفوق في الدنيا. فلما

بيشوف سنة وراء سنة إن الأخت الملتزمة دي
والأخ الملتزم ده مميز في دراسته، غالبًا
بتسهل أنت عليه الطريق إلى الله سبحانه
وتعالى، وعادة بيروح يسألك أنت إزاي عملت
كده؟ طب إنت بتحضر دروس لمين؟ طب
بتحضر دروس فين؟ طب يا، الأخت تسألك يا
أختي انت بتحفظي القرآن فين؟ إنت بتذاكري
إزاي؟ وبتبتي عمليّة التأثير بتحصل، عمليّة
التأثير دي ما كانتش بسبب لحيتك، ولا بسبب
نقابك، ولا بسبب مصحفك، إنما كان بسبب
الدرجة اللي جبتيها، تمام!

 **السبب الثاني:** إن في حد بقى العكس،

العكس، في حد ثاني عايز يثبت فشل التجربة
دي، وعايز يشمت في الأخت، أو عايزة
تشمت في الأخت، أو عايز يشمت في الملتزم

ده، ونفسه ومنى عينه إنه يلاقي درجة سيئة،
عشان يشنع، بصوا اللي عامل لنا عم الشيخ
أهو شايل مواد وإحنا اللي عدينا! خليه ينفعك
امشوا معاه، امش بقى مع الشيوخ، امش مع
الشيوخ، خليه ينفعوك بقى، شفت أديها، قاعدة
طول السنة، قاعدة لي في الدار، وقاعدة لي
بتحفظ قرآن، وقاعدة لي بقى في الدروس،
دورات علاء حامد، ودروس محمد غليظ،
وقاعدة لي طول النهار تسمع لي حازم شومان
يلا خليه ينفعوكوا بقى، أهى شالت مواد أهى
وساقطة وبتاع ومش عارفة تعدي من السنة،
والبنات المتبرجة اللي قليلة الأدب، اللي بعيدة،
اللي بتمشي مع أولاد جايبه درجة كويسة،
وكل البنات متلفين حواليتها، وكل البنات

واخدينها قدوة، ليه؟ليه أنا عملت كدة؟ فأنا
نيتي أدخل الجامعة أغير الموازين دي..

أغير الصورة النمطية دي..

والحمد لله الحمد لله أنا أيام الجامعة يعني
الحمد لله عملت كدة تقريبا.

يعني أنا قلت لكم إن أنا تقريبا كنت بجيب على
طول جيد جدًا.

أحياناً كنت بجيب في بعض المواد امتياز.
بعض المواد جيد جدًا لكن التقدير العام في
العادة كان بيبقى جيد جدًا.

فدا فرق معي كثير كثير في دعوتي. فرق
معي كثير في تأثيري على الناس. لدرجة إن
كان بيحي لي ناس كثير يسألوني أنت بتعمل
كدة إزاي؟

طبعًا أنا كنت بذاكر لهم يعني كان الناس
بيجوا لي عشان أذاكر لهم. فكان سهل جدًا أن
أنا ءأثر عليهم وأن أنا أقنعهم بالالتزام لأن هو
بيجي لي في ملعبى.

■ عشان كدة بنقول أن التزامك هيساعدك على
الدعوة. فأننا كنت مثلاً بيجي لي واحد البيت.
يجي لي البيت فاقعد أسمع فيه في دروس بقى و
أسمع القرآن وأسمع فيه في حاجات وأكلمه بقى
بين المذاكرة والمذاكرة بيقد معي شهر
أذاكر له ما بيطلعش من بيتي إلا بلحية يعني
لازم يطلع بلحية...

■ وملتزم طبعًا بينزل يصلى معي في المسجد
غصب عنه عشان أنا اللي بشرح له.

■ لدرجة أن كان في بنات في الجامعة

بيسألوني يعني أنا هي حاجة غريبة يعني!

كان في في بنات تخيلوا كان ممكن توقفني
تقول لي هو أنت إزاي كدة! أنت إزاي يعني
بتحفظ قرآن وبتحضر دروس وبتدي دروس
وفي نفس الوقت أنت بتجيب درجات عالية
يعني.

■ يعني اه وبنشوفك حياتك جميلة وسعيدة إحنا

مش عارفين نعمل كدة. متخيلين!

كان أحياناً بيحصل مواقف محرجة قوي بس
يعني عايز أقول لك مدى التأثير أن حتى
الشخص اللي هو الراجل فيه بنات كانت
بتراقبه..

هم عايزين يلتزموا مش عشان بيحبوه ولا
الكلام ده لأ.

هي عايزة تلتزم بس هي شافته في رجل.
والعكس ممكن يكون ولد عايز يلتزم بيتأثر
ببنت أصلاً

■ يعني بنت مميزة في الدفعة وملتزمة يروح
هو يلتزم.

مش مسألة علاقة وحب وهيكلمك سيبك من
الكلام ده، أنا بتكلم في أن هو التأثير ده تأثير
على الجنسيتين يحصل...

👉 **أنتم متخيلين؟! فالي عايز أقوله أنا داخل**
أعمل الجو ده. أنا هقعد يا جماعة خمس سنين
في الكلية.

خمس سنين هقابل شباب وبنات هيصة هقابل
هقابل مئات مئات من البشر.

أنا أمام فرصة رهيبة لعمل تأثير رهيب
ولتغيير تصور وصورة نمطية عن المسلم
وعن الملتزم كبيرة جدًا. مش بقول بس في
الطالبة بل أكبر من كدة.

■ أنا ممكن ءأثر على معيد ودكتور

■ أنا ممكن ءأثر على معيد ودكتور ويكون أنا
سبب في هدايته....

لأن الدكتور أكثر واحد مركز لما يلاقي
الملتحي دا أو الولد الشاب اللي على طول
بيطلع يصلي ده اللي هو كان في اول الترم
متضايق منه؛ أنت علطول تطلع تصلي أنت
علطول مش عارف إيه والبنات اللي هي كانت

استفزت الدكتور دي اللي هي المنتقبة اللي
كانت عاملة استفزاز للدكتورة لما الدكتور
تلاقي هي أكثر واحدة بتسألها أكثر واحدة
مركزة في المحاضرة أكثر واحدة مهتمة أكثر
واحدة بتروح لها المكتب تتكلم معها أكثر
واحدة بتجيب درجات وبتتفوق في العملي وفي
النظري...

الدكتورة نفسها بتتأثر

■ تخيل لو أنا عملت تأثير في دكتور أو

دكتورة ممكن يفرق في إيه؟؟

أنا هطلع من الجامعة والدكتور ده قاعد بيأثر
على آلاف مؤلفة من بعدي وأنا يعني عندي
بيحضر دروسي دكاترة جامعة أنا عندي في

دروسي في ناس بيجوا لي الدروس دكاترة
جامعة..

عندي دكتور في كلية طب وعندي دكتور في
كلية هندسة عندي أكثر من دكتور جامعي
بيحضروا لي دروسي على الأرض كمان
يعني أعرفهم شخصيًا.

تخيل بقى أن أنا أما واحد زي ده أعلمه العقيدة
وأعلمه الفكر وأعلمه الفقه وأعلمه الدعوة إلى
الله...

أنا برمي واحد في الجامعة عامل إزاي؟

وهو خد بالك يعني دكتور الجامعة ده لم
يحضر دروسي إلا عشان أنا المهندس علاء
حامد لأن هو عنده حنة كده معينة هو عايز
يحضر لواحد مهندس زيه.

فدي جابت رجليه دا حلو أنا مش مهم بالنسبة لي.

يجي بأي شكل وبعد كدة حصل التأثير أنا أذكر كان دكتور عندنا في الجامعة في أول سنة لم يكن ملتزم تقريبًا. أذكر أن واحد دكتور وإحنا متخرجين كان لحيته بقت قد كدة وشفته كان بيحضر لي خُطب جمعة.

كان بيجي يحضر معي خطب جمعة. كنت أنا بقى محرج جدًا وأنا على المنبر والدكتور ده قاعد تحت رجلي. باقى عايز أنزل من على المنبر أقبل إيدته لأن الدكتور فذ

دكتور ده كان أذكى رجل شفته في حياتي. تخيل لما واحد يكون أذكى رجل تشوفه في حياتك ويلتزم ويبقى رجل منضبط جدًا في السلوك في معاملاته، الدكتور ده بسمع عنه

أنه عامل تغيير غير عادي في الجامعة...إذا
أنا تأثيري ممكن يكون على معيدة معيد دكتور
دكتورة كل ده في دماغي.. كل ده في دماغي
وانا جوة الجامعة، عايز أعمل كل ده عايز
أطلع بحاجة تمام؟ أنا كل ده بتكلم عن النوايا
بص النوايا؛ شتان بين واحد دي نيته وبين
واحد نيته بنات تزبيط بنات سهرات قهاوي
سينمات هنخربها رحلات جامعة، وبنات
تقول عايزة بقى آخذ راحتي في لبسي عايزة
ألبس مقطع فكك من لبس الثانوية ده، عايزة
بقى أتعرف على ولاد عايزة أعرف بقى
المجتمع الآخر، عايزة أروح بقى رحلات
جامعة مختلطة عايزة أبقى معاهم نروح شرم
عايزة أروح الساحل شتان بين النوايا
لايستون لا يستون عند الله ده عمل صالح

وده عمل فاسد.. وهي نفس الجامعة ونفس
المذاكرة ونفس الامتحان بس ده في ميزان
حسناتك وده ميزان السيئات.

فاللي بقوله أول طلعة بنطلعها واحنا بنتكلم
على الجامعة النية فهتم حاجة؟

طيب خاينا نكمل في النصايح هقول لكم
دلوقتي

﴿معادلة الفشل في الجامعة ثلاث حاجات

تعملهم علشان تفشل إذا أردت أن تفشل في
الجامعة ثلاث حاجات ثلاث حاجات تعملهم
عشان تبقى فاشل في الجامعة اللي موافق
على الثلاث حاجات دول برضو يقول لي صح
عشان أحس أن أنتم مصححين معي.

☞ أول حاجة إذا أردت أن تفشل في

الجامعة واحد عليك أن تشغل ☞ **بالجنس**

الآخر لو أنت ولد اعرف بنات لو أنت بنت

إعرفي ولاد دي بداية الدمار الشامل في

الجامعة أنا بقول لكم إن أنا مريت في

الجامعة باللاتين بالناحيتين أنا كنت في

الجامعة في أول سنة ونص تقريبا شخص

عادي وبعد كده التزمت بفضل الله سبحانه

وتعالى شفت كده في نفسي وفي غيري عايز

تفشل في الجامعة واحد انشغل بالجنس الآخر

لو أنت بنت ركزي مع الولاد تعرفي على

ولاد وصاحبي واتكلمي وامشي واعلمي

وده زي اخويا عيشي بقى في الحنة دي كثير

لو أنت ولد حاول تستكثر من معرفة البنات

إعرف بنات كثير. حب واحدة حب اتنين

والباقي بقى دي زي أختي ودي بنت لطيفة
بتسلى معها ودي بهزر معها بالليل ودي
بتحب الكلام ودي بتحب المشي ودي دمها
خفيف بتسلى بها هيحصل كالاتي نمرة واحد
هتلاقي نفسك فيه مستويين من الدمار المستوى
الأول من الدمار أن أنت تقع في حب أو
عشق. طبعاً عشق بقى. تعشق واحدة جدا تبقى
متيم بها أو العكس. دي هتدمرك لأن ده معناه
استهلاك تام لكل طاقتك. الوقتية والذهنية
والنفسية ده هيسهلكك جدا صدقني. وهقول
كمان شوية أنه بلا فائدة. هتفهموا كمان شوية
هقول لكم إن ده بلا فائدة لنفسك هتلاقي نفسك
مستهلك ذهنيًا في التفكير في البنت اللي
بتحبها. طول النهار بتفكر فيها تحلم بها بتركز
معها في الجامعة في المحاضرة قاعد عينك

عليها في السيكشن عينيك عليها مش مركز
مع الدكتور مش مركز في مذاكرتك دي نمرة
واحد. نمرة اتنين مستهلك نفسيا. لو مثلا قبل
ما تكلمها يا ترى هكلمها ازاي؟ وتتعرف
عليها ازاي؟

وطب اقول لها ازاي؟ طب ولو قلت لها
هترفضني قاعد انت مثلا شهر في الحطة دية
دمار بقى انت قاعد بتدمر نفسك في الحطة
دي. طب كلمتها في احتمالين إن هي تقبلك أو
ترفضك لو رفضتك هتبقى متدمر فوق الدمار
دمار تعال لي بقى اقعد لي سنة سنة بقى
ايه؟ بقى قاعد بتسمع ايه؟ أغاني حزينة تسمع
أغاني فريد الأطرش، وعائش بقى أنت في
كاظم الساهر هنقعد سنة مع كاظم الساهر لغاية
ما يجي لك اكتئاب، في سنة هتروح من حياتك

بسبب الاكتئاب اللي حصل لك، بسبب أن أنت
اترفضت.

الإحتمال الثاني اللي هو الأسوأ أن هي تقول
لك ماشي وتطلع عادي هي معجبة بيبك هي
كمان وتمشوا مع بعض بقى، تبدأ بقى مقساه
أكثر يعني الحل الأول هيتعبك سنة بس.

الحل الثاني هيتعبك طول الجامعة بقى، طول
الجامعة قاعد بتفكروا في بعض وبتهرؤا مع
بعض وبتكلموا بعض، وشوية أنت مشيتي مع
فلان طب ليه كلمتي فلان طب أنت بتبص
لفلانة طب، أنا زعلانة منك طب أنا مخصماك
طب أنا مخصماك ثلاث أيام طب، أنا مش
هكلمك طب بلوك عالواتس، طب بلوك
عالفيس طب، أنا آسف طب صالحي، طب
تروح لصاحبته طب ما تصالحيننا على بعض،

طب ما تكلم لي الواد ده يصالحني عليه طب
اتصالحنا، طب هدايا طب دبايب عيد حب
عيد العمال طب ستة أكتوبر، طب يلا بنا
نتمشى طب أنت زعلانة مني في حاجة؟ طب
أنا نفسي اتجوزك بس؛ أنا هكون نفسي يلا بنا.
هنقعد في كمية استهلاك، أنا ما بتكلمش عن
حلال وحرام دلوقتي دي مسألة مفروغ منها
حرام، بكلمك على كمية التخلف العقلي
والهري اللي أنت هتعيش فيه.

وزعلانة وقماص وقماصة وبصت لي ولا
أنت رديتي عليها مش حلوة. طب كلميني طب
أكلماك بالليل. طب قفلت ليه؟ طب ليه ما
رديتش طب باعت لك واتس من زمان. يا
لهوي! على الهري اللي أحنا بنعيش فيه. أنت
بتستهلك فعلا. فعلا أي علاقة عاطفية جوة

الجامعة في السكة الغلط هي عملية إهلاك.
إهلاك لبني آدم إهلاك لبني آدمة. وقتياً وقت
بيضيع، نفسياً، ذهنيّاً. كل ده وقت بيروح.
نفسك متوترة، دائماً في حالة إضراب، دماغك
مش مركزة، هتعتدي إزاي في الجامعة دي
ولسه كمان شوية هقول لك أن السكة دي ما
لهاش لازمة. ده نمرة واحد.

نمرة اتنين معلش هو أنا بقوله غلط ولا صح؟
أنا بقول غلط قولوا لي أنا بقول غلط. بس أنا
عارف أن ده اللي بيحصل. شفته في وفي
غيري وفي ناس وإلى الآن بيتحكى لي كل يوم
قصص في الحوارات دي.

☞ **نمرة اتنين عشان تفشل في الجامعة**

الطريقة الثانية. أكره الكلية ☞ أكره الكلية

اللي أنت فيها أنت راجل كنت عايز تخش

أسنان كنت عايز تخش صيدلة مجموعك ما
جاش جاب علوم أنت كنت عايز تخش هندس
تمام مجموعك ما جتش جاب تجارة إنجليزي.
داخل بقى ايه قرفان بقول لك ايه كلية ديه أنا
داخلها كده بمجموع وبتاع والكلية دي ما
لهاش لأزمة. وأنا أصلا بص هنا من الكلية
وهو يومين وهنقضيهم بلا قرف. أنا عايزك
ايه، عايزك تعيش الليلة دي تمام أكره الكلية،
لأي سبب بقى. وأقعد بقى في الكلية خمس
سنين مش طايق نفسك. ليه؟ ليه؟ أنا خلاص
لازم يبقى عندك حاجة اسمها مرونة. عندك
خطة دائما خطة أخرى. أنا مجليش صيدلة
خلاص جالي علوم هي دي الكلية اللي هبقى
ناجح فيها. أنا ما جاليش هندسة جالي تجارة
إنجليزي. ايه المشكلة؟ فين المشكلة؟ خلاص

خش هنا وتميز. ما تکرهه‌اش. ما تکره‌اش.
صدقوني أي مجال، أي كلية هتتفوق فيها
هتجيب معك. وأي كلية مش هتتميز ولا تتفوق
فيها مش هتجيب معك. مع إحترامي لكل
الأطباء والمهندسين.

في أطباء على قد حالهم. يعني لا هو لا ولا
كورسات ولا فهمان الجامد ولا بتاع، هو
عاش في حنة صغيرة كده في حكومة بيأخذ
مرتب على قده، ويمكن محاسب بيأخذ أكثر
منه أو ممكن واحد بيشغل أصلا صناعي
يعني هي مش كده يعني. في مهندس على قد
حاله مش مميز في ما كانش جامد ما كانش
كورسات ما كانش بيطور نفسه. أشغل في
مصنع محدود ممكن يأخذ ألفين ثلاث آلاف
جنيه يعني. هي مش كده. لا ممكن أجيب لك

واحد خريج كلية تجارة عربي مش هقول
تجارة إنجليزي لا ولد ولد فعل . بيعرف يدخل
ومذاكر ويعرف يعمل دراسة وتحليل وبتاع
وعنده شغال على النت وعنده عملاء وعنده
زباين وواد فهمان وجامد .

بص معاه يقدر يدخل في جيبه في الشهر
عشرين ألف جنيه على الأقل - دماغ -
عرف يتميز في كليته ، ما كرههاش ، قال لها
خلاص أنا في تجارة هتشوف هعمل إيه ، أنا
دخلت تربية، هتشوف هطلع عامل إزاي ؟

طلع مدرس ممتاز ، طلع محاسب شاطر ،
طلع يعني - يعني - في رياض أطفال
متميزة ، لقت نفسها لقت السوق عايزها ،
وبدأت تفرض شروطها ومرتبها ووضعها
وفلوسي ، لقت شغل على النت لأن النت ما

بيحترمش إلا المتميزين ، والننت ما بيهزرش
هتشغل مع الناس برة ، هتشغل مع أجانب ،
هتشغل مع عرب ، ما فيش هنا وسايط
ومجاملات ، يا إما تكون قد الكلام يا إما
هتفقس مع أول وظيفة هتعملها ، اول حاجة
هتسلمها هيتعرف قيمتك وهيتعرف وضعك ،
مش مميز ما لكش مكان .

هتقول لي في مصر فيه فساد ، واللي مش
مميز بيوصل ، ماليش دعوة بمصر إحنا
دلوقتي ما بنتكلمش في مصر ، أنا بتكلم إن
أنت أغلب الشباب دلوقتي شغال على أونلاين
أصلاً ، شغال مع عرب ، شغال مع أجانب ،
شغال وهو قاعد في بيته ، شغال على مواقع ،
تمام ؟ فأنا مش قصدي أنا آسف مش بقلل من
أي كلية على فكرة ، يعني كل الكليات على

دماغي ، عشان كده أنا بقول لكم أنا - أنا -
مش قصدي أي كلية أنا بالنسبة ليا ما فيش
كلية قمة وكلية قاعة ، أنا بتكلم في عُرف
الناس بيقول لك : ده هندسة ، ودي تجارة ،
ودي تربية ، ودي طب ، كل ده هري ما
لوش لازمة ، أنا في الآخر ليا في النتيجة ،
في واحد هيعرف يجيب أكل عيشه ، ويعرف
يخلي الدنيا تحترمه ، بس هو ده .

و في واحد هيبقى على جنب مش عارف
يبقى حاجة لأن هو تعبان ، سيبك من كليته
كانت إيه؟ هو تعبان ، مش هيبقى حاجة .

ولو في مصر فيه وسايط وفساد والكلام ده برة
ما حدش بيتكلم في الكلام ده ، وأغلب الشغل
دلوقتي بقي اون لاين ، أنت ممكن تقعد في
البيت تشتغل .

ففي ناس معرفوش يلاقوا شغل على الأرض ،
بس يعرف يجيب من النت أحسن شغل تتخيله
، بيقبض بالدولار ، عايز إيه أكثر من كده
؟! بيعمل مصلحة كده في ساعة ياخد بيها
١٠٠ دولار أو عشرين أو خمسين دولار ،
رقم بياخده واحد في شهر.

اكره الكلية ، يعني يقعد في الكلية كده إيه ؟
مش طايق نفسه ، الكلية مش عاجباك ، مش
عايزها تمام؟ ده طريق الفشل.

واقعد بقى ايه طبطب على نفسك ، إن الكلية
دي مش دي الكلية اللي أنا كنت عايزها أصلاً
، مش دي أحلامي ، وإن أنا دخلتها غصب
عني ، وبالتالي أنا هفشل فيها ، ما حدش
يكلمني بقى. ليه يعني ؟

لأخش خلاص ده تحدي خش في الخطه
الجديده و خلاص انتهى الكلام.

❗ يبقى إيه نمره واحد ؟

■ أعرف أعمل علاقات مع الجنس الآخر

■ نمره اتنين اكره الكلية

■ نمره ثلاثة صاحب ناس فاشلة

❗ دي نصايحي علشان تفشل في الكلية.

☞ احب ب ناس فاشلة. ما هي طبيعة

الشخص الفاشل ؟ مين الشخص الفاشل ؟

هقول لكم شوية كلمات كده وتقولوا لي انا صح

ولا غلط ؟ وتقولوا لي ده في صحابكم ولا لا

؟

صاحبك أو زميلتك

1- لما بيروح الجامعة أجي أحضر

محاضرة يخليني ما أحضرهاش ، بقول لك إيه أنت هتقرفني ما تحضرش ، ما تيجي تقف معايا شوية رايح السكشن أحضر ، السيكشن ده نفخ ، ومواعيد نفخ ، والمحاضرة بتاع مالهاش لازمة ، يقول لك تعال نروح نشترى بطاطس من الكانتين ونقعد نخربها ونطلع نتمشى شوية ، ونيجي على آخر اليوم ما تيجي نقف في بنات تعال في فلانة ريهام وسالي وتعال نقعد معاهم .

2- كل ما تيجي تذاكر يقول لك يا عم

مذاكرة إيه يا عم ؟ ما هنلمها في الآخر ، فكك من المذاكرة ، بقول لك إيه أنت هتعمل لي دحيح ، أنت مذاكرة إيه يا

عم ؟! فكك المذاكرة دي ، هنلم في
الآخر وخلصت ، ما تقرفناش بقى ،
وتلاقيه كل مكالماته معاك يلا على
القهوة ، يلا على السينما ، يلا على
القهوة ، يلا على الماتش ، يلا على
البلاي ستيشن ، يلا على الكافيهات ،
والبنات صاحبتك اللي هي ما تعرفكيش
إلا لما تاخدك في مول ، تاخدك في
كافيه ، تاخدك في حوارات ما لهاش
لازمة ، تقعد تهري معاكي في التليفون
في قصص حياتها كلها بالساعات كل
يوم ، ويوم ما تيجي تقولي لها يلا نذاكر
تلاقي إحباط وفشل ولأ وبتاع وفي نفس
الوقت هو صاحبك ده دايمًا بيوهمك إن
هو ما بيذاكرش خالص ، يقول لك ده –

ده - أنا ما بفتحهاش ، ده أنا الكتاب ده
ما بفتحهاش ، - ده أنا - ده أنا عامل
معاه علاقات قطع علاقات يعني الكتاب
ده ما بشوفوش طول السنة أنا وأنا يا
ابني أنا بتاع مذاكرة أنا أنا والله ما
بفتحها وسبحان الله بينجح إزاي ابن
الذينة ما حدش عارف. وأنا اللي سقطت
في الآخر وأنا اللي سقطت في الآخر
نجح. ما تسألنيش إزاي؟ ما تسألنيش
إزاي؟ طلع سوسة. فدايما كده. ودايما
محسك الدنيا جميلة. وكله هيتلم وبتاع
ويا عم اللي ذاكر ذاكر من عارف ده.
اللي ذاكر ذاكر من زمان. واللي ذاكر
من زمان زمانه نسي. والعبارات
الأكلاشيات دي اللي إحنا حافظينها. اه.

وفي الآخر هو اللي بيعدي وأنا اللي بعيد
السنة. وفي الآخر ما تعرفش هو كان
بيذاكر فين وإزاي وفي الآخر هو ما
يعرفكش. مجرد ما عداك بسنة بقي
بيبص لك ايه؟ نظرة دونية. إنت عيل
تحت ده أنا معديك يالا بسنة.. إهرب من
أي شخص بيعمل هذه الأفعال. اهرب
من أي واحدة بتعمل معاكى هذه الأفعال.
تمنعك من حضور، تيأسك من المذاكرة،
تألس عليك لما تفتحي كتاب طول حياتها
معاك. هري وحوارات وتضييع أوقات
مهولة. أو بتكون أسوأ من كده مثلاً
بتجرك عشان تتعرفي علي أولاد أو
واحد بيجرك عشان تتعرف على بنات
غصب عنك. وهري في هري في هري.

خلاص دي ثلاث نصايح للايه؟ للفشل
في الجامعة. واحد.. فاكرينهم إكتبوا
الثلاثة. مين شاطر يكتب الثلاثة نصايح؟
واحد. تعمل علاقات مع الجنس الآخر
سواء حب أو أصحاب. يعني حتى
الصحوية العادية اللي هو زي أخويا
وزي أختي كله بقى طول النهار انت
ايه؟ طول النهار انت مع مشكلة إيمان
مع هدى. والنهاردة آآ آآ ريهام إشتكت
لي من ميرفت. بقى قاعد بقى في
حضانة بقى سعيدة بقى. وهم برضه
قاعدين بقى شاغلين نفسهم بحواراتكم.
بص أي علاقات مع الجنس الآخر دمار.
دمار صدقني بنت ولاد، ولاد بنات انسي
. نمرة اتنين أكره الكلية. نمرة ثلاثة.

صاحب اللي ايه العيال أو البنات
الفاشلين اللي أنا قلت لك صفاتهم عشان
عاطول تلقطهم أول ما تلقطه هوب هو
ده اللي الشيخ قال لي عليه اهرب. طيب.
تعالوا بقى أرجع لكم للنقطة اللي احنا
ايه؟ نكشناها من شوية. وهي ليه؟ أنا ما
بنصحش. أي حد يعمل علاقة عاطفية
في الجامعة. هانفترض افتراضين.
كويس إنكم بتكتبوا مبسوط منكم.
هانفترض افتراضين... الإفتراض الأول
إن أنت تعمل علاقة محرمة. ايه هي
العلاقة المحرمة؟ إن أنا أتعرف على
بنت. وهمشي معاها وهمسك إيديها
واقول لها كلام حب وهنفضل نوجد
بعض بالجواز وبتاع. دي علاقة حرام.

تمام؟ للآخر هي حرام حرام في حرام.
فدي دي بس هي دي حرام. بس هو في
الآخر هو فعلا فعلا بيجبها ومعشم نفسه
أن هو هيتجوزها. العلاقة الثانية.. علاقة
مش حرام. بمعنى واحد في الجامعة هو
ملتزم شاف واحدة ملتزمة وعجبه
إلتزامها وتدينها وبتاع. واتعلق بها
ويمكن هي خدت بالها برضو ومش
ممانعة إن هو اه ييقى في بينهم ارتباط
والجو اللطيف ده. ويمكن لها وسيلة
معينة إن هو يعبر لها عن رغبته في
الارتباط بها وعشمها وعشمته وقالت له
أهلا بيك بس بس هم مش هيعملوا حاجة
حرام. تمام؟ مش هيعملوا حاجة حرام.
الإثنين عندي مش فارقين دلوقتي. يعني

انا مش موضوعي دلوقتي وأنا بتكلم
دلوقتي حرام وحلال لأن الصورتين
عندي فيهم مشكلة كبيرة جدا جدا.
المشكلة دي كارثية. ايه هي المشكلة؟
يعني أنا زي ما قلت لكم أنا مش هتكلم
طبعاً الصورة الأولانية حرام كلها.
الصورة الثانية ممكن يعني ما يكونش
فيها حاجة غلط حصلت. بس الإثنين
غلط. فأنا أنا مش هتكلم هنا في حجة
حرام وحلال، بقدر ما أنا هتكلم بشكل إن
ده غلط في الدماغ يعني خطأ فكري،
خطأ منطقي ليه؟ وأنا اللي هقوله يا ريت
تتفاعلوا معايا وتقولوا لي شوفتوه ولا لأ
؟ صح ولا غلط ؟ اللي بيحصل كالاتي
إن الشاب أو البنت.. الشاب مثلاً. أعجب

ببنت. هو دلوقتي في أولى كلية أو تانية
كلية. وهي زييه أكيد غالباً بتكون في
نفس الدفعة. فهو بكل سذاجة أُعجب بها.
سواء بقى أُعجب بها بشكل حرام حلال
مش هو ده موضوعي دلوقتي. وحبها
وعايز يرتبط بيها. فهنا بقى بيبدأ العمى
بقى العمى ايه هو العمى؟ إن هو بيحب
وهي وهي يمكن تكون شافته، وأعجبت
به، والكلام دوت، وصرح لها، ووصل
لها الرسالة بطريقة حرام، أو حلال
برضو مش ده موضوعي. والإثنين
تعلقوا ببعض. بيبدأ هنا العمى يحصل
حالة من العمى بيحصل إيه العمى
بقى؟ أيه طبيعة العمى؟ إن ما فيش حد
بيفكر تفكير منطقي في ديت. مفيش حد

بيفكر تفكير منطقي في اللحظة ديت.
الشاب دلوقتي يا جماعة أنت عايز
ترتبط بديه. تعال نفكر بالراحة. وقول
لي:

﴿ اللي أنا بقوله : ده صح ولا غلط.﴾

عشان أنت كاشاب تتجوز محتاج
تخلص الجامعة، محتاج تخلص جيش،
تعرف موقفك من الجيش ، محتاج
تشتغل، ويبقى لك مرتب ما ، محتاج
يبقى عندك شقة ،أو على الأقل مرتبك
كبير لدرجة إن إنت هتأجر. يعني إذا أي
حاجة قبل ما تكون خلصت جامعة ،
جيش، بدأت تشتغل موقفك ضعيف جدًا
جدًا قدام أي أسرة تمام؟ أنت عشان
توصل للى أنت ليك قلب تروح تتكلم

مع ناس في الغالب هيكون متوسط
عمرک "ستة وعشرين سنة". "ستة
وعشرين سنة" متوسط عمرک إلا لو
ماكانش أكبر من كده. عشان تبقى ملىان
عندک إجابات اللي هتتسأل عليها يوم ما
تروح لحد هيسألك يا ابني أنت فين؟
أنت بتشتغل أيه؟ مرتبک كام؟ طب أنت
تفتح بيتک إزاي؟ طب أنت آآ عندک
شقة؟ عادي أي أب هيسأل كده، وحقه
يأمن بنته . لو لقی الإجابات دي مش
موجودة هيقول لك: لا ، وبالتالي العلاقة
إنهارت. طيب ده متوسط سن زواج
الرجل حوالي "ستة وعشرين" أو
"سبعة وعشرين". طيب البنت بقى في
الجانب الآخر هذة البنت اللي هي ممكن

تكون فعلاً الأخت الملتزمة اللي هي ما
بتعملش حاجة غلط ديت ، أو أن هي
مش ملتزمة حتى ، ومتبرجة ، وحلوة ،
وعادي. الإثنين طالما مميزين كده
بيافتوا الأنظار في العادة واحدة زي دي
بيبدأ يجي لها عرسان ، وهي في تانية
كلية ، وفي تالثة كلية. صح ولا غلط؟
بيتدي يجي لها عريس بقى كبير يجي لها
واحد أكبر منها *بست* *سنين* أكبر
منها *خمسة سنين* هو كويس شخص
كويس. ما يترفضش. شخص فعلاً
محترم ، أو ممكن يكون ده لو ملتزمة
يجالها ملتزم، وراجل ممتاز ، وعلى
خلق ، ودين كل حاجة. ميترفضش
تمام؟ وبيجي لها بقى ده بيجي لها

عرسان. تمام؟ وهي عندها "عشرين
سنة" ، "واحد وعشرين" بدأ يجي لها.
وصاحبنا ده آآ لسه في "تانية كلية"
معها. ولسه قدامه **"خمس ست سنين**
"عشان بيتدي بس يفكر إزاي هاروح
أكلم ولدها؟ وهنا بيدأ العقل يشتغل بعد
ما يكون القلب ورطنا ، و دخلنا في
علاقة ، واتعلقنا ببعض بشكل ما، وعشنا
بقى وهم الحب بقى عمانا وهم إن إحنا
هنتجوز "تمام" ، وبعد كده إكتشف البنت
أكتشفت إن هي ممكن تتجوز ، و هي
في "سنة تالته" مثلاً ما فيش مانع ، وفي
عرسان كتير بيجوا لها في نفس الوقت
الشاب ده أنت هتجي أمتى ،وهتكلم بابا ؟
ولا مش هتكلمه؟ لا ما أدرش هكلمه

إيه؟! ما عنديش حاجة. أنا ما عيش
حاجة أنا لسه قدامي كلية ، وقدامي
جيش، وقدامي شغل طب يعني خلاص
سلام ، ويبدأ بقي إيه عملية الدمار
الشامل بقي. إن بي فوقوا على الواقع إن
إنت هتجوزي. مستحيل هتستتي واحد
"خمس سنين" كمان ، وأصلاً مش
عارفين القصة هتخلص على إيه بعد
"خمس سنين" حتى . وأنت إيه اللي
خلاك تعلق قلب واحدة ، ولا أنت تتعلق
،ولا تتنيل على عينك؟! طالما أنت مش
عارف راسك من رجليك. زي ما بقول
لكم: يعني أنا بقول : اللي ممكن يعمل
الحركة دي اللي هو فعلاً ممكن يروح
يطلب من واحدة الزواج وهو في

الجامعة. واحد أبوه هيجيب له كل حاجة
أنا موافق ما عنديش مشكلة "بابي"
هيجيب لك كل حاجة شقة هيجوزك من
الألف إلى الياء هيصرف عليك. وأنت
في الجامعة ، وأنت في الجيش لغاية ما
تشتغل إتفضل يا حبيبي روح كلم بنات
روح إتكلم. مش قصدي كلم بنات روح
بقى آأ أطلب إيدى واحدة فى سنك فى
الجامعة ما عنديش مشكلة. عندك بيت؟
عندك أرض؟ عندك حاجة بتأجرها؟
عندك حاجة هتفتح بيتك؟ ما عندكش
أخوات ولاد؟ مش هتخش جيش. الدنيا
سالكه معاك واعرف أتجوز دلوقتي.
أقدر أروح أتقدم فى الصيف الجاي ده
أروح أتقدم لأبوها إتفضل. أنا موافق.

واختار من واحدة ملتزمة كويسة، ولو
في سنك ما عنديش مشكلة. لكن أنت)
إنسان عادى) زينا طبقة متوسطة اللي
هو أبويا مش هيقدر يشيلاني. أبويا كتر
خير ه صرف عليّ. ويدوبك هيساعدني
كده على إيه؟ على قد اللي ربنا يقدره
عليه، وأنا لازم أتخرج، واشتغل
واجيب واخلص جيشي وبتاع والكلام
ده.. وهشتغل وربنا سهل، يبقى حرام
عليك حرام عليك نفسك وحرام عليك
بنات الناس أن أنت تفكر في ارتباط في
الجامعة وأنت ما تعملهاش أبدا أبدا ما
فيش الكلام ده. الباب مقفول تماماد كل
العروض مقفولة تماما لأن غالب
العروض هي من النوع ده حتى لو

عرض من ناحية الالتزام ما فيهوش
حاجة غلط خالص واحد بيطلب أيديك
من أبوكي يعني بيقول لك أنا عايز
اتجوزك لكن هو مش هينفذ دلوقتي يبقى
خلاص ما فيش ما فيش بقى حاجة
اللي هو ايه؟ بعد الجامعة وبعد الجيش
ما فيش الكلام ده دلوقتي أهلا وسهلا
تعالى قابل بابا مش دلوقتي ما فيش ما
لوش لازمة الكلام وغالبا وتسعة
وتسعين في المية من الكلام مالوش
لازمة كله مالوش لازمة فاحنا بنضيع
وقت ولأن النهاية مأساوية النهاية عبارة
عن ايه؟ عبارة عن اتنين محطمين
عاطفيا اتنين محطمين عاطفيا ومعلش
قولوا اللي شفتم الصورة دي ولا لأ؟

شفتم في الآخر بنت ولد... واحدة عشان
لازم تتجوز ولسه قلبها متعلق بالواد اللي
لسه في الكلية لغاية دلوقتي.. شفت
واحد؟ شفت صاحبك اللي اتجوز بعد
سنتين بعد الجيش وكان طبعاً اللي حباها
دي مخلفة دلوقتي ولسه بيفكر فيها
ومتعلق بها ليه عملت في نفسك
المصيبة دي؟ يبقى أنا قلبي مع حد
وجسمي مع حد مالوش لازمة الكلام...
يبقى أنا مش هاقعد مش هانزل النزلة
دي خالص خالص لن أفكر قط... أي
خاطر يجي لي في الباب ده أصل هي
كويسة أصل محترمة أصل ملتزمة أصل
لقطة ماليش دعوة في غيرها يوم ما
تحب تتجوز هتلاقي غيرها هتلاقي

واحدة كويسة ولقطة وملتزمة بس غالبا
هتكون أصغر منك بخمس سنين...
صح؟ هات لي واحد متجوز واحدة في
سنه غالبا فرق السن بيبقى خمس سنين.
لأن ده الطبيعي. متوسط سن الزواج
الراجل سبعة وعشرين. متوسط سن
الزواج البنت اتنين وعشرين. احنا بنتكلم
في ايه؟ ده الطبيعي. يبقى مالوش لازمة
الكلام يبقى أنا أي فكرة تجي لي
الارتباط العاطفي في الجامعة أقتلها في
مكانها... خلص بقى أنت جامعتك
وخلص يا عم جيشك وبتاع... لقيت بقى
الأخت بتاعة الجامعة دي اللي كانت في
سناك لسة موجودة روح اتجوزها... ما
لقتهاش خلاص وده الطبيعي مش

هتلاقيها تمام أما إن أنا أربط حد بحد
ونرتبط ونتعلق حرام أو حلال مجرد
الفكرة نفسها ما أنصحكمش والله بقول
لكم كده عشان أنا بحبكم في الله وبقول
لكم كلام ما حدش هيقوله لكم... الكلام
بقوله لك ده دلوقتي ما حدش هيقوله لك
أنت أما تقع على رقبتك ولما تيجي تعيط
لي في رسايل زي ما ما شباب كثير
بيعملوا لي وبنات بيعتوا لي وتبعت لي
رسالة وأنت مش عارف تعمل ايه
وتقول لي أنا كلمتها وبقى لي سنة بنتكلم
وبتاع وبيجي لها عرسان وأنا مش
عارف أعمل إيه ما تجيش تعيط وافتكّر
إن أنا قلت لك، وافتكّر قلت لك وهي
مش عارفة تعمل ايه يا شيخ وهي مش

عارفة ترفض ولا توافق على العريس
وأنا مش عارف أروح لها ازاي؟ ما
تزعش... خلاص؟ أنا قلت لكم...
والكلام ده هشيله لك الكلام ده أنا جاييه
لك من من هرس أنا هرسته في الحياة
في نفسي وفي غيري وفي آلاف الشباب
حواليا وفي بنات فاهمين الفكرة؟ أنا
بتكلم كلام صح ولا غلط؟ اللي أنا بقوله
ده واقع ولا مش واقع؟ نسبة نجاح
الحاجات دي قد ايه؟ ما تعديش خمسة
في المية يبقى أنا مش أبقي هاري قلبي
وأهري حياتي وأدمر عواطفي مع
واحدة.. وفي الآخر الاقيها في حنة تانية
المهم أنا كان عندي كلام كتير لسه عايز
أقوله بس الوقت خلص للأسف فلازم

أخلص دلوقتي. عشان أنا مش بحب
أطول. هيكون لنا لقاء تاني. الأثنين
الجاي. وهجيب لكم نصايح الجامعة
وهنكمل كلامنا عن الجامعة أرجو من
الله ذلك يعني أن يكون الموضوع مناسب
فالنهارة خدنا بس شوية نصايح كده في
السريع احنا بندخل الجامعة ليه؟ ليه
بنتفوق في الجامعة؟ كيف تفشل في
الجامعة؟ ليه بقول لك في مشكلة كبيرة
جدا أن أنت تعمل علاقة عاطفية في
الجامعة؟ عشان تبقى عايش وصدقني
الكلام ده مش هتسمعه برة فأنا بعاملكم
زي اخواتي على فكرة. يعني أنا بعتبر
أني قاعد أدرش، مش عامل درس دين
قوي يعني بفضفض لكم باللي أنا حاسه

دي آلام بشوفها كل يوم مش حبيب أن
أنتم تقعوا فيها تمام يا شباب يا بنات؟

خلاص كفاية عليكم كده عشان ايه ما الكلام ما
ينسيناش بعضه أشكركم على الصبر على
اللايف دوت وإن شاء الله اللايف ده محفوظ
انشروه بقى للبنات والولاد وتعيشوا حياتكم
وسمعوه للناس كلها تقابل الاتنين الجاي إن
شاء الله على خير.

**سبحانك اللهم وبحمدك أشهد أن لا إله إلا أنت
استغفرك وأتوب إليك . السلام عليكم ورحمة
الله.**